

OSMOGLOTTA

Official mensual organ del OCCIDENTAL-UNION

Redaction e Administration : INSTITUTE OCCIDENTAL. CHAPELLE (Vd) Svissia



COMITÉ
DE
RÉDACTION :

Prof. E. de WAHL
(Estonia)

Dr Bertil BLOMÉ
(Svedia)

Dr H. NIDECKER
(Svissia)

Nr. 125
Serie A
MARTE
1939



EVOLUTION DEL IDÈ DEL LINGUE INTERNATIONAL

Volapük 1881

Cifef klubama bevünetik nünom kopanales omsik, das al motôfadel masela obsik ostitamon pükati ko litamags. Nütliif plo kompanals binom glatik.

Esperanto 1887

La estraro de la internacia Unigho sciigas ghiajn anojn, ke ye la naskightago de nia majstro ghi okazigos prelegon kun lumbildoj. La eniro por anoj estas senpaga.

Ido 1907

La direktantaro de la internaciona Uniono savigas da olua membri ke ye la naskodio di nia maestro ol aranjos diskurso kun lumprojekturi. La eniro por membri esas gratuita.

Occidental 1922

Li direction del international Union informa su membres que ye li die de nascentie de nor mastro it va arangear un discours con projectiv images. Li intrada por membres es gratuit.

CURT GRAMMATICA DE OCCIDENTAL

INFINITIVES: Finale -r. Ex.: fini-r, ama-r, deve-r.

ADJECTIVES: Finale inobligatori -i. Ex.: micri.

ADVERBIES: Finale -men. Ex.: visibil-men, regulari-men.

PRESENT del verbes: li radica sol. Ex. tu fini, tu ama, tu deve.

PASSATE: Finale -t. Ex.: tu fini-t, il ama-t, noi deve-t.

PASSATE COMPOSIT: per auxiliare ha-r. Ex.: tu ha finit, noi ha videt.

FUTURE: auxiliare va. Ex.: Tu va finir, il va amar, etc.

CONDITIONALE: auxiliare vell. Ex.: tu vell finir, yo vell prender.

IMPERATIVE: PLES, o li radica sol. Ex.: Ples finir! Fini!

PARTICIPIE PRESENT: -nt. **PARTICIPIE PASSAT:** -t. **GERUNDIVE:** -nte.

MASCULIN: -o. **FEMININ:** -a. **PLURALE:** -(e)s.

Un sol **ARTICUL** definit: li. Adjectives invariabil.

PRONOMINES PERSONAL: Yo, tu, il, illa, it; plurale: Noi, vu, illi.

Occidental ne es un nov lingue, nam it es composit ex li international paroles ja conosset sur li tot terra. Pro to Occidental es li max facil lingue por li majorité del popules.

Occidental es difuset per li **OCCIDENTAL-UNION** (Sede: Chapelle, Vaud, Svisia), quel es neutral in religion e in politica, e per li national societés de propaganda. Li Occidental-Union es directet de un **SENAT**, e del **CENTRAL OFICIE** durant que li **ACADEMIE** decide pri li linguistic formes.

Li **Institute Occidental** in Chapelle (Vaud), **SVISSIA**, responde immediatmen e gratuitmen a omni demandes de information concernent Occidental, su scope, su grammatica e su vocabularium, e coresponde in francés, german, anglés, italian, hispan, Esperanto, Ido, Occidental.

Ples adherer al OCCIDENTAL-UNION !

ACTIV MEMBRE	Annual contribution : a) sviss Fr. 5.— con gratuit abonnement a Cosmoglotta ; b) sviss Fr. 8.50 con abonnement de propaganda (3 exemplares).
PROTECTORI MEMBRE .	Annual contribution : Adminim sviss Fr. 10.— (recive li abonnement de propaganda ; o 1 abonnement de propaganda por chascun sviss Fr. 10.—).
MECEN MEMBRE	Annual contribution : sviss Fr. 50. recive secun desir 1-5 abonnamentes de propaganda.
PERPETUI MEMBRE	Unic subvention de sviss Fr. 500. — recive secun desir 1-2 abonnamentes de propaganda.

Ples demandar li carte de adhesion del:

Occidental-Union, CHAPELLE (Vd), Svisia.

Chef-redactor: R. Berger, prof., Morges (Svisia) - **Administration:** Institute Occidental Chapelle (Vd) - **Reclames:** A. Moeckli, Languedoc Bellevue, Ch. du Reposeir, Lausanne (Svisia)

COSMOGLOTTA

HISTORIE DEL ALFABET

Qui es li inventores del alfabet?

Li nomin self, **alfabet**, veni del lingue grec, in quel li du unesim litteres del alfabet nominat se **alfa** e **beta**. Por designar li totalité de lor litteres, li Grecos dit li « alfa-beta », quam noi di li « abecedarie » de A, B, C.

Por comensar on deve conceder que nor alfabet grecolatin es composit in tre strangi maniere. Li vocales e consonantes es inmixtet ye hasard; on vell facilmen har posset trovar un arangement plu bon.

Ti bizarrità explica se per li fenician scrittura. Nor alfabet veni del Latinos, queles hat prendet it del Grecos, queles hat recibet it del Fenicianes.

Li Fenicianes ne ha inventet li scrittura. Long ante ili, altri popules, quam li Egyptianes e li Chineses, hat creat signes por transmissor li idé, ma ti unesim signes esset *ideografic*: chascun de ili representat un parol, un idé e ne un son. On besonat do tant signes diferent quant idé. Li actual scrittura chinés contene circa 40.000 signes. In li ancian Egyptian li complicationes esset ancor plu grand, pro que cert signes, o hieroglyfes, representat idé, altres silabas, e altres sones. On comprende do pro quo li scrittura egyptian, expandet abundantmen sur omni monumentes del Valley del Nil, restat indechifrabil desde li unesim seculs del Era Cristian til 1821, quande li francés scientist Champollion successat trovar li « clave ».

Li Fenicianes, li grand mercatores e viagiatores del antiquità, besonat un scrittura rapid por redacter lor contos. Pro que ili esset in constant relation con li Egyptianes, de queles ili imitat li artes e utilisat mem li sarcos por metter in ili lor propri mortos, ili prendet anc li elementos de lor scrittura. Ma quam practic homes ili selectet inter li enorm quantità de hieroglyfes solmen un duantene de signes, tis queles representat li **consonantes**.

Modificante e simplificante ti signes, li Fenicianes obtenet li unesim fonetic alfabet: noi reproducte it in li unesim linea de nor synoptic tabelle (Fig. 1).

On vell posser questionar pro quo li popul egyptian, quel esset tam intelligent, ne creat self un fonetic alfabet, vice embarassar se con un masse de complicat hieroglyfes. Li cause es que li Egyptianes posedet tre bentost un abundant literatura quel hat fixat li scrit lingue. A ili esset do desfacil, presc impossibil, transformar li traditional scrittura. On save que hodie presc omni tentatives supresser li ortografic complicationes in francés e anglés fat fiasco, principalmen pro li enorm literatura existent in ti lingues.

1 Phéniciens de dr. à g. noms phéniciens:	Alef (bœuf)	bet (maison)	guimel (chameau)	daleth (porte)	hé	vau (clou)	zain	heth	teth (serpent)	iod (main)	kaf (peigne)	lamed (iguillon)
2 Ecr. primitive grecque de dr. à g.	A	B	^	Δ	Ξ	Υ	Ζ	Η	Θ	Ι	Κ	Λ
3 Noms grecs	alpha	beta	gamma	delta	epsilon	digamma	zeta	eta	theta	iota	kappa	lambda
4 Ecr. grecque de gauche à droite	A	B	^	Δ	Ξ	Υ	Ζ	Η	Θ	Ι	Κ	Λ
5 Evolution	A	B	Γ	Δ	Ε	Ζ	Η	Θ	Ι	Κ	Λ	Λ
6 Alphabet chalcidien	A	B	C	D	E	F	Z	H	Θ	I	K	V
7 Ecriture romaine	A	B	C	D	E	F	^{nouvelle} G	H	TH	I	K	L
8 Variantes	A	B	C	D	E	F	G	H		I	K	L
9 Onciale	A	B	C	D	E	F	G	H		I	K	L
10 Demi-onciale	a	b	c	d	e	f	g	h		i	k	l
11 Epoque moderne												

TABELLE SYNOPTIC. — Figuras 1 a 11

Li alfabet fenician.


Li Fenicianes ne havet literatura. Necos impedit les crear un systema de scrittura tam simplic quam ili volet. Con rason, on fat remarcar que li fonetic alfabet posset nascer solmen che un popul ne ligat per un long literari tradition.

Lass nos nu studiar ti fonetic alfabet, li unesim quel aparit in li monde. (Fig. 1). Nor synoptic tabelle adver ne es complet. Por simplificar noi eliminat du litteres fenician queles ne intrat in li grec lingue. Li fenician alfabet havet do 22 litteres.

Reascendente del demi-unciale (Fig. 10) quel es familiari a nos, til li origine, on divina strax li filiation de nor **A, Z, H, K, L, M, N, O, Q**. Li altri litteres fenician ne sembla comprensibil, ili va esser tal pos li secuent demonstration.

Li nomines, queles li Fenicianes dat a chascun de lor litteres, explica se per un involuntari similità. Constatante que lor signes simileat pluminu a images conosset, lor creatores dat les li nomin del concernet image. It es extra dūbit, por exemple, que **Alef** similea a un

Fig. 12
Pierre
de
Thera



In li fig. 12 noi da un exemple de ti arcaic scriptura ; to es li famosi làpid trovat in li insul de Thera (hodie Santorin). On reconosse tre bon li litteres feniciam **Rho**, **Hé**, **Kaf**, caracteristic del fenician scriptura. Ma on constata ja in it un important modification : Durant que li Fenicianes scrit sempre de dextri a levul quam li altri popules semitic (p. ex. li Judéos), li unesim Grecos ne

tardat innovar. Pos har comensat per scrit anc de dextri a levul, ili provat li altri direction. On constata in lor historie un periode de hesitationes, de quel li làpid de Thera es un bell exemple: Li 1-im e 4-im lineas ea de dextri a levul, li 2-im e li 3-im lineas, in contrari, ea de levul a dextri, li litteres essente tornat in li sam direction.


On nu comprende pro quo in nor litteres quam **B**, **D**, **R**, **K**, etc. li streca vertical es in levul e li altri strecas avansa vers dextri. It es causat per li direction del scriptura. Li sol exception, **J**, explica se per su recent creation, it ne existet in grec e latin.

Li Grecos transforma li fenician alfabet.

Recivente li scriptura del Fenicianes, li Grecos fat progressivmen tri essential modificationes in it :

- (1) ili adoptet finalmen li direction de levul a dextri ;
- (2) ili creat li vocales ;
- (3) ili fat li litteres vertical.

Pos li epoca del inscription de Thera, li Grecos prendet li custom scrit alternativmen vers levul e vers dextri



Ti disposition, quel fat memorar li sulcos cavat de un plug, esset nominat bustrofedon, i. e. reveniente sur su tracie quam li boves plugant.

Ma li bustrofedon presentat li incomodità mutar li form del litteres de un linea al altri. Bentost on renunciat a it por adopter un uniform direction, de levul a dextri, disposition poy adoptet de omni scripturas originat del grec, it es : de omni european scripturas.

Li direction vers dextri, quel apare nos li max natural, pro que li scriptura fat ne es celat del manu quel scri, tamen ne es universal. Talmen li hebreic scriptura (sam quam li Fenician), li arab, li persan, li caldean, li tatar es scrit de dextri a levul. Li chinés e li japanés es scrit generalmen de supra a infra, durant que li ancian Mexicanes o Aztecos scrit de infra a supra. On vide que chascun direction haver su artisanes.

Li invention del vocales.

Li Fenicianes ne scrit omni sones de lor lingue, solmen li consonantes, ne li vocales. Ma li grec esset un lingue sonori, rich in vocales, it aparet indispensabil, por evitar confusiones, scrit anc li vocales, **a, e, i, o, u, y**. Esque on devet inventer nov litteres por representar les? Ples consultar li duesim range de nor synoptic tabelle por comprender qualmen li problema esset soluet.

Li Fenician alfabet ne posedet vocales, ma esset rich in gutturales e demi-vocales, p. ex. **Alef, Vau, Hé, Iod, Ain**. Pro que ti sones ne existet in Grec, li litteres devenit disponibil. Tande li Grecos havet li genial idé adopter les por traducter li 5 vocales. Li **Alef** devenit **A**, li **Hé** = **E**, li **Iod** = **I**, li **Ain** = **O**.

Poy ili duplicat li **Vau** fenician, quel esset pronunciat tande quam *w* (anglés), e traet de it li digamma **F** (pronunciat quam *w* in Anglés e Occidental), poy li **Y** (pronunciat quam in Occidental), quel ili plazzat in li fine del alfabet, quam it dece a un nov-arivat.

Li fenician **Vau** nominat se in Grec *digamma* pro que it simileat a un duplic gamma (Γ). (Poc a poc it devenit mut in pronounciation e desaparit anc ex li scriptura. Li son **U** esset representat in Grec, analog quam plu tard in francés, por combinar li litteres representant li sones **O** e **Y**.) Li gamma esset, quam monstra nor synoptic tabelle, li 3-esim litter del alfabet. De *gamma* ha venit li expression « cruz gammat » (format de 4 gammas formant un rot), usat in quelc lingues por li cruz Swastika, symbol del sole ascendent e del rote del vive o del reincarnationes, in recent témpores adoptet quam emblema del national-socialism.

Li verticalisation del litteres.

Transprendente li alfabet del Fenicianes, li Grecos ne solmen completat it, ma ili ancor fat li litteres plu vertical. Por comprender ti transformation on deve memorar li gust instinctiv de ti litt popul por li artes. Null altri popul posedet plu bon li sensu del ponderation, del equilibrie. Li Fenicianes, in contrari, esset plu comerciant quam artistic; por ili it esset un creation essentialmen utilitari; ili traciat li litteres irregularimen.

Li Grecos verticalisat les, dessinat les plu geometric, dependente omnicos quo preterpassat supra e infra. Li comparison inter li 1-esim e 2-esim linea de nor tabelle synoptic es instructiv pri to. Li obliqui lineas de **Alfa, Delta, My, Ny** prende nu egal inclination. Poy, durant li seculs, li barre del **Alfa** deveni horizontal, li principal streca de **Gamma, Delta, Epsilon, Iota, Lambda**, deveni vertical pos har esset obliqui.

Quele litteres, quam **H, I, S, X**, simplifica se. Sol **Pi** (= **P**) vide su gamb alongar se. On divina li cause de to: reerectente **Gamma**, on fat it simil a **Pi**. Por evitar un confusion, on adjunctet un triesim streca a ti ultim litter, quo dat li *pi* bon conosset in aritmetica.


Plu tard **Gamma** subisset un nov mutation: li cude esset plazzat ye demi-altore. Li litter **C**, quel li Greco-latines pronunciat **G** dur, in comensa ha surtit de **Gamma** per li arondation del litter.

Li arondation del litteres.

Quam monstra li ranges 5, 6, 7 de nor tabelle synoptic, un nov evolution evenit in li formes del litteres durant li grec historie. Antey angulosi, li litteres devenit rond. Li cause de ti arondation deve esser serchat in li natura del instrument usat por scrir. In comensa, li scrittura esset gravet in ligne, in petre, sur li monumentes. Ma, in un dur materie, it es plu facil graver rect lineas quam curvat tales ; de to veni li formes angulosi del primitiv alfabet. Ma li usation del cålamo sur papyrus e li necessità scrir rapidmen ductet li scritores a arondar li angules, a vicear les per curves. Por exemple it es plu facil traciari li **O** per un sol curve (C) quam per du rect lineas (◁). Sam remarca por **D**, **S**, etc.

Li custom scrir rapidmen ductet anc li Grecos a crear cursiv litteres, analog a nor minuscules e bon conosset hodie, nam ili es constantmen usat in scientie : α , β , γ , etc. Ti cursiv litteres finalmen viceat li litteres primitiv in li ordinari scrittura.

Por monstrar til quel punctu li natura del instrument influe li form del litteres, on vell posser citar li casu del lingue chinés. Li alfabet chinés, quam omni scrituras, comensat per esser dessin, it es per representar li object self : Talmen in prim li sole esset figurat per un disco (fig. 14), li lun per un crescent (fig. 16). Ma li chinéses scri ne per un plum o per un crayon ma per un pinsel, quel tracia plu



facilmen rect lineas quam curves. Pro to li chinés scrittura, de secul a secul, ha devenit sempre plu angulosi. Hodie it traducte li idé del sole per li figura 15. e ti del lun per li fig. 17.

On posse do afirmar que li scrittura chinés ha evoluet in un direction exactemen contrari a ti del grec scrittura, pro li differentie del instrument : de rond it devenit angulosi, durant que li greco-roman scrittura de angulosi devenit rond.

Li nov litteres del grec alfabet.

Extra li vocales **Alfa**, **Iota**, **Omicron**, **Ypsilon**, li Grecos creat quelc altri signes queles havet un vive plu o minu long, por exemple **Phi**, **Khi**, **Psi**, queles servit plu tard a far li roman ciffres **D** = 500, **L** = 50, e **X** = + (de u venit nor **X** = 10). Finalmen ili creat **O** long, nominat *Omega*, per oposition a **O** curt, nominat *Omicron*. *Omega* esset plazzat in li fine del grec alfabet ; De to venit li expression : « li Alfa e Omega » significant : « li comensa e li fine ».

Li alfabet Chalcidian.

On ne deve creder que li grec alfabet evoluet regularimen e simultanmen in li tot peninsul, quam sembla far creder nor tabelle synoptic. In realità existet pluri varietàs de alfabetes, quar principal. Ti quel max interessa nos es li *chalcidian*, talmen nominat pro que it esset usat in li region de Chalcidia in li insul Euboea. Effectivmen ti

alfabet nascentat li alfabet latin, pro circumstanties queles noi va studiar in secuent. Ti alfabet dat a *Lambda* ne li form usual **V** ma li form **L**, quo explica li origine de nor actual **L**.

Long pos que li Romanes hat adoptet li alfabet chalcidian, li Grecos continuat usar simultanmen li altri varietàs. Solmen in li epoca de Socrates, li unità esset fat in Grecia. In 403 ante J.-C., un decret del popul athenian decidet adopter oficialmen li alfabet ionian e bentost omni altri grec popules secuet ti exemple. Ma tande li progress del instruction causat ti duplication del scrittura pri quel noi parlat supra : li **capital** utilisat por li monumentes, e li **cursiv** por li ordinari besones e li libres.

Li roman alfabet.

Del VIII^{iesim} al VI^{iesim} secul (a. C.), Chalcis in li insul Euboea esset un del max rich cités de Grecia. Precipue de ta departet li unesim grec colonies queles venit etablisser se in li Sud de Italia e queles fundat inter altri li cité de Cumes proxim Napoli, circum li annu 800 ante J.-C. Naturalmen li Chalcidianes aportat con se li grec artes e lor particulari systema de scrittura. (Alcun historicos asserite que li intermediatores esset li Etruscos).

Li Romanes ne adoptet ti alfabet quam it esset ; ili adaptat it a lor lingue, lassante cader li signes queles ili judicat inutil, *Theta*, *Omega*, *Phi*, *Khi*. Pri li altres on va constatar, comparante li lineas 6 e 7 que ili retrova se in latin sin mult changes, exceptet que **Z** es viceat de **G**. Ci un explication es necessari.

In li unesim seculs del roman historie, li **C** latin servit traducter li son **G** (= pronunciation guttural) quam fat li grec litter **Gamma** de quel it veni. Li **K** traductet li sam son, ma dur, quam ancor hodie. Bentost li distinction inter ti du consonantes dur e dolci obscurat se, li **C** sol servit traducter ambi sones (G e K). Poy li Romanes denove sentit li beson distinyer per scrit inter li du sones **K** e **G**. Por expresser li son **G**, ili modificat levimen li **C** adjunctente a it un litt appendice, poy ili serchat un piazza in lor alfabet por metter li nov litter.

Ma it existet just un piazza liber inter **F** e **H** pro li desaparition de Zeta quel esset inutil al Romanes. On mettet do ta li nov litter **G**.

E pro que li **C** ne plu servit expresser li **C** dur, li **K** heredit del Grecos ne plu havet utilità. Tamen it ne desaparit completmen ; on conservat it in li comensa de quelc rar paroles, quam *Kalendae*, *Kaeso*, benque li grammaticos considerat it quam superflù.

Pos li conquestation de Grecia, li Romanes interessat se mult al literatura de ti land. Li grec cultura, plu rafinat quam lor propri, aquisitet un grand prestige in lor oculos. On comensat traducter li ovres grec in latin ; li paroles grec invadet li lingue latin. It aparit necessari posser expresser in latin li sones **v** e **z**. On reprendet tande, in li unesim secul ante J.-C., li du grec litteres eliminat antey, **V** e **Z**, durant que til ti epoca li alfabet roman haltat ye **X**, quel Quintilianus nomina « li ultim de nor litteres ».

Li invasion del grec paroles in latin fat ancor necessari li admission de **Theta** e **Phi** queles li Romanes in comensa hat rejectet. Por evitar li introduction de nov litteres on usat li medie de diagrammas : **Theta** esset traductet per **th** e **Phi** per **ph** (Ex. **Theosophie**).

Un altri litter, **P**, changeat su form. Remarca que li Romanes hat cludet li bucle del **Pi** chalcidian por far ex it nor **P**. Ma tande ti litter esset confuset con **Rho** (= R) ; pro to on decidet modificar ti ultim litter adjunctene a it un obliqui streca, in comensa tre curt, poy alongat til li linea de base. Talmen nascet li actual form del **R**.

Pri li **F** o **Digamma**, quel in grec esset pronunciati quam **w** demi-consonant, it prendet li valore del **F** in latin.

Li latin alfabet, talmen format, esset composit de 23 litteres. 3 litteres do manca por formar nor alfabet modern. Ti tri litteres es **J**, **V** e **W**, queles esset introductet in un recent epoca. Desde li unesim secul ante J-C. til li fine del Medievie, ti alfabet restat sin mutation.

Influent persones, grammaticos o imperatores provat pluri vezes far admitter nov litteres, ma sin durabil success. Li imperator Claudius, por exemple, ordonat li adoption del vertet digamma (**J**), por representar **V** consonant (in ti epoca **V** representat li son *u*), li antisigma li son *psi* e un signe **⚭** expressent un intermediari son inter *ü* e *i*. Alcun inscriptiones, pervenit til nos, monstra quelc exemples u li reform esset applicat durant quelc témpor. Ma pos li morte del imperator, ti litteres desaparit del alfabet.

Li proportionones del litteres roman.

Assertente que desde li Romanes li form del litteres ne ha changeat, noi deve preciser que li proportion de chascun litter tamen ha evoluet un poc. On va comprender it studiante atentivmen un roman inscription del grand roman epoca, poc exemples ti del trajanic colonne (fig. 18) gravet in 114 pos J-C. (altore del litteres : 12 cm.).

fig. 18 Colonne Trajane (114 ap. J-C)

A B C D E F G H I L M N
O P Q R S T V X E B

To es li perfect typ del roman scrittura monumental. It es interessant serchar per quo it difere de nor capital scrittura.

Li modern capital litteres dessina se presc omnis in un rectangul con constant proportionones, generalmen 4 a 3. Ma li Romanes dat a ili tre different largores. Li **C**, **D**, **G**, **O**, **Q**, esset presc circules o fragmentes de circules. In revanche, li **E**, **B**, **F**, **P**, **R**, **S** esset plu strett quam hodie. Li Romanes dessinat les con du quadrates superposit ; lor proportionones esset do 2 a 1.

Li sones **V** e li **U** esset scrit sammen ; to es li rason pro quo ancor hodie in li monumental inscriptiones on scri in imitation del styl roman : **MVSEVM**.

Ples remarcar anc que li gambes del **M** es escartat durant que noi tracia les hodie vertical. Regardante denov al figura 5 de nor synoptic tabelle, on constata que li Romanes conservat simplicmen li form ricevut del Grecos.

Li monumental latin scritura es ancor caracterisat per li elargation del streca in extremità del gambes. Ti elargation, nominat *apis contribue* mult a dar a litteres ti aspect solid e imposant ; pro to ti specie de litteres es utilisat hodie por li titules.

Ultim remarca : In li latin inscriptiones omni litteres have li sam altore, exceptet li **L** quel es sovente plu curt o plu long quam li altres.

Li cursiv roman scritura.

Sam quam li Grecos, anc li Romanes utilisat, apu li capitales, un rapid cursiv scritura por li omnidial besones, por exemple por li notation sur li tabulette ex cire (li paper ancor ne existet). Ha restat numerosi exemples de ti cursiv scritura, specialmen tabulettes de cire retrovat in li ruinas de Pompeii. Noi da in li fig 19 un linea de tal scritura con transcripction in modern minuscules.



On suposi que ti cursiv scritura esset solmen capital scritura deformat per li rapidità. In it li circules es viceat del rect strecas tre poc curvat, nam in li cire li stil tende sempre ear secun rect lineas. Anc ta li specie del instrument ha modificat li form del litteres.

Tamen ne ex ti scritura surtit nor ordinari scritura. Li evolution ha esset plu complicat. Ti origine deve esser serchat in li capitales queles per un lent transformation e passante per li unciale e li demi-unciale finalmen nascentat li minuscules queles noi usa hodie.


Li uncial scritura.

Durant que su formes manet inchangeat sur li monumentes, li roman capitales evoluet poc a poc in li manuscrites. Sur li petre o li metall, u on avansa lentmen, li capitales con rect lineas es in fact facil a graver ; ma sur un materie plu tendri u on avansa rapidmen per li medi de un plum (cálamo), it es advantageous arondar li angules. Noi ja constatat it parlante pri li evolution del grec scritura.

Noi mey prender un exemple : Por traciare li capital litter **E**, on ne besona minu quam quar strecas de plum, quo postula tro long témpor. (Fig. 20).

Instinctivmen li scritor sercha simplificar it traciante per un sol colp de plum li vertical e li superiori e inferiori strecas (fig. 21). Finalmen pro que li cudes alenta ancor tro li movement, on aronda plu e plu li

angules superiori e inferiori e on obtene tot naturalmen li fig. 22.



Talmen ha esset creat li scrittura nominat *unciale* quel apari circum li IV secul. Plu tard ancor on ha format li **e** per un sol streca de plum e on creat li **e** minuscul del fig. 23. Sam evolution por li **H** (fig. 24-29, li **A**, li **V**, etc.

Ples remarcar passante que si li **U** vicea li **V** in li unciale, to ne significa que evenit un change de pronounciation. Li **U** continua traducter quam li **V** li sones **V** e **U**. Li du lîtteres va esser distinyet solmen plu tard.

Li unciale difere del capitale solmen per li form arondat del lîtteres indicat in grass in nor fig. 9. In li lîtteres conservant li sam form, alcun vertical strecas comensa preterpassar li trunc del scrittura, supra e infra, por exemple **D**, **G**, **H**, **P**, **Q**. Li unciale constituet do un unesim passu vers li creation del minuscules.

Fig. 30 - Unciale VI^e Siècle

NEMO ENIM VULT TERREFRENITICUS
ETIAM SI VIDEAT FRENETICI VIRE

(Nemo enim vult esse freneticus etiam si videat frenetici vires...)

On ha serchat saver de u proveni ti término de **unciale** quel caracteriza ti scrittura. In li antiquità li *uncie* esset li deciduesim parte del pede (circa 3 cm). On crede do que ti término de *unciale* servit a designar lîtteres de grand dimensiones, in oposition al current scrittura. Tamen li característica del unciale ne trova se in li altore ma in li arondat form de un decene de lîtteres queles esset angulosi in li capital alfabet.

Fig. 31 - Unciale - Bible (Codex Amiatinus) Env. 700

ET IPSE STABAT SECUS STAGNUM
GENESARETH ET VIDIT DUAS
NAVES STANTES SECUS STAGNUM

(et ipse stabat secus stagnum) genesareth et vidit duas naves stantes secus stagnum)

Del IV-im al VII-im seculs, presc omni libres esset scrit in unciale, si ne in un mixtura de lîtteres uncial e capital. In plu, li constant usation del cálamo causat li differentiation del strecas in larg e strett lineas.

Li demi-unciale.

Li tendentie del unciale a prolongar li verticales supra e infra del litteres por facilitar li letura e a traciari tis ci per un sol streca por scriir les plu rapidmen causat li creation del scriptura nominat **demi-unciale**, quel esset usat del VI. al VIII. secul, just ante li reform de Carolus Magnus, de u su nómine de pre-carolin quel on da it quelc vezes.

Fig. 32 - Demi-unciale - Commencement du IX^e s.

Ubi oleum sub eius benedictio
ne crevit et ampulla cum oleo

(Ubi oleum sub eius benedictione crevit et ampulla cum oleo.)

Comparante li lineas 9 e 10 del synoptic tabelle, on vide li transformation finit: li demi-unciale ha creat li minuscules. Li formes es presc tis de nor minuscul alfabet actual, exceptet li **t**, de quel li cap ancor ne súpera li trunc del scriptura, e li **n**, quel conserva su form de capitale. Ti superviventie del **N** majuscul es sin dúbit debit al necessitá evitar li confusion con li **r** de quel li duesim streca esset in ti epoca tre alongat.

Li minuscules do ne esset creat per un sol colp; ili resulta de un lent evolution quel ea del III-esim al VI-esim secul pos J.-C.

Pro quo li minuscules es plu usat quam li capitales?

To veni ne solmen pro que ili es plu simplic e plu rapidmen scrit. In li printerías, it ne es plu long composir textus per capitales quam per minuscules. Ti preferentie es debit a un rason plu grav: si vu mette vis-a-vis du textus printat de sam grandore, li un in majusculas, li altri in minuscules, vu va constatar que li duesim es mult plu leibil. Li gambes queles surti supra e infra del trunc es quasi brasses queles signala li presentie de un cert litter e permesse reconosser plu facilmen li paroles. Pro to li capitales ne plu es utilisat in nor dies exceptet por li titules in gross litteres o por li propri nómines.

Li separation del paroles.

Li exemples de greco-latin textus queles noi da, monstra que in li antiquitá on scrit max sovente sin separar li paroles, quo esset tre genant por li letura. De altri láter, li litteres de chascun parol ne esset interlineat quam hodie, mem ne in li cursiv (fig. 30). Poc a poc li scritores ligat li litteres por ne esser obligat interrupter li streca de plum. Li ligaturas ha mult contribuet a modificar li form del litteres e a crear li minuscules.

Li national scrituras.

In omni landes submisset del Romanes, li scriptura latin expandet se in sam témpor quam li lingue latin. Ma pos li invasion del Barbares e li disruption del roman Imperia in independent nationes, li latin scriptura transforma se in tam mult national scrituras, adver ne tre

diferent. Sur li continente li demí-unciale nascentat li lombardic scrittura in Italia, li wisigotic in Hispania, li merovingian in Francia.

Li wisigotic scrittura aparit in li VIII e desaparit in li XII secul, pro li penetraton del carolin scrittura pri quel noi va parlar in sequent. Secun li exemple quel noi da in li fig. 33 con transscription in modern minuscules, on vide que poc litteres esset diferent de tis del demí-unciale : li **a** es scrit quam **c**, li **t** quam **a**, li **s** quam **f**.

Ecriture Wisigothique 919 Fig. 33
Tunc astacius comer. iussit eum
capite plecti. quūq̄ decollatus esset.
 (Tunc astacius comes. Iussit eum capite plecti: quūq̄ (=quūq̄ue) decollatus esset.)

Li scrittura carolin chassat progressivmen li wisigotic, unesimli in li nord, mersí al monacos quel li celebri abatia de Cluny in Francia hat inviat in li altri láter del Pyrenés.

Li merovingian scrittura es caracterisat precipue per li **a** quel es scrit **cc** e per li **u** quel es scrit presc quam un **a**, in li majuscules quam in li minuscules.

Li lombardic scrittura es li scrittura del Italianes del IX-esim til li XIII-im seculs. It reyet principalmen in li Sud del peninsul u it esset expandet del monacos del Monte Cassini proxim Napoli e tis de

Ecriture lombardique: 1058-1087 Fig. 34
In sanguine suo. et fecit nrm regnum
sacerdotib. dō & patri suo. Ipsi glā
 (In sanguine suo. et fecit nrm (=nostrum) regnum sacerdotes dō (=deo) et patri suo. Ipsi glā)

La Cava proxim Salerno.

In li nord, li domination de Carolus Magnus fat preferer li carolin scrittura. - In li lombardic scrittura, li characteristic litteres es li **a** quel es scrit quam **cc** e li **t** quel es scrit quam un **a** prolongat per un horizontal streca in li angul superiori. In fine, li lombardic prendet un special aspect, quam monstra li fig. 34. Usante un larg plum, tenet con li manu ad-extra, on dat li max grand largore al strecas obliqui durant que li vertical gambes es strangulat in lor medie. De to resulta un tre bell aspect ornamental, ma anc un leibilitá reductet.

Li reform de Carolus Magnus.

Carolus Magnus esset un calid partisan del developament del instruction. Il creat numerosi scoles e un movement de renovation del artes e del literatura. In consequentie li arte scrit, quel esset in plen decadentie, prendet un nov elan. Li abatia de Tours in li annu 800, developat un grand activitá in ti dominia e creat un nov form de scri-

tura nominat carolin. In it li **V** es sempre scrit **U**, quam in unciale, ma li **a** prende finalmen li form **a** e plu ne **oo**.

Li gotic scrittura o Fraotura.

Li término « gotic » aplicat al scrittura e al arkitektura es absolutmen fals. It es debit al Italianes del Renascentie por queles omnicos venient del Nord esset barbaric o « gotic », mem si li gotic popul ne esset concernet. In fact li scrittura del Gotes, conosset sub li nómin « *runes* », esset totalmen diferent del scrittura nominat « gotic ».

Fig. 35 - Majuscules du psautier latin N° 10435 - Bibl.nat.



Durant li medievie li latin alfabet expandet se lentmen in li tot Europa mersí al prestige del lingue e del civilisation latin. It finalmen viceat completmen li particulari scrituras del barbares, mem in li landes scandinav (dan, sved, norveyan) e in li landes germanic (anglés, hollandés, german) de queles li lingues esset tamen foren al latin. It ha mem intrudet se al lingues completmen extra li familie indo-europan, quam li hungarian (madyar) e li basc (e recentmen mem al turc).

Pos li XII secul, li latin caracteres devenit plu angulosi, sin dúbit sub li influentie del arkitektura gotic in quel dominat li verticale. Ti gotic scrittura durat tam long quam li arkitektura de sam nómin, til li XV secul u it esset viceat del cursiv o italic. It ancor dominat in Germania quande li printation esset inventet ; li unesim caracteres de printeria esset do gravet in gotic e li unesim libres difuset ti género de scrittura in li landes de lingue german. On posse dir que li printerie ha fixat in Germania li gotic scrittura. Ma pro que li gotic es solmen un deformaion general del latin scrittura ye un cert epoca, it ne existe rasones considerar it quam un scrittura specialmen « german ».

Li gotic scrittura del medievie ne havet proportiones e formes tam rigid quam li gotic docet hodie in li scoles. In realitá, it mult variat e ti variationes es tre preciosi por li arkeolog e li historico a queles ili permesse determinar li date de un inscription in un maniere sat precis.

Por exemple li gotic **scritura** del XV-esim secul es plu strett quam ti del XIV, e li vertical strecas dómina **tant** que it es tre desfacil distinyer li litteres.

In omni casu li gotic majusculas del medievie esset mult plu simplic e plu bell (vide fig. 35) quam li formes inutilmen complicat trovabil in omni manuales de calligrafie e queles es imitat de un gotic **scritura** decadent del XVI secul! Noi va citar inter altris li litter **E** quel in li gotic **scritura** del bell epoca es format de un **C** e de un verticale ligat de un barre transversal; li **M** quel similat a un **O** reposant sur un barre horizontal e separat in du partes per un linea vertical; li **H** e li **N**, de quel li duesim gambe esset format in fine quam un croc.

Li **scritura del Renascentie.**

In li fine del XV-esim secul, sub li influentie del humanistes, on abandonat li gotic **scritura** por reprendre li arondat demi-unciale plu leibil e plu conform al gustes latin. Li reform esset propagat principmen de un Italiano nominat Aldo Manuce (1449-1515), pro to li nov **scritura** esset nominat italic. Manuce fat graver li caracteres per li juvelero Francia, secun li **scritura** de Petrarca.

Li **scritura** nominat « anglés » in li scoles de lingue francés ne es altricos quam li italic tal, ornat del gravores amant li jolli curves. Li término « anglés » es do inexact, ma pro que li usagie vole que on nómina « italic » li **scritura** inclinat in li printation (in landes de lingue francés), on esset obligat serchar un altri nómin.

Li difusion del printerie havet un felici influentie sur li manuscrit **scritura** quel devenit plu leibil in li XVII-esim secul.

Li 3 ultim litteres admisset in nor **scritura :**

Noi videt in li fig. 7 que li alfabet latin havet solmen 23 litteres : **A B C D E F G H I K L M N O P Q R S T V X Y Z**. Li **J** e li **I** esset un sol litter **I**, scrit quelcvez **J**. Adplu, pos har longmen representat li consonante **V** e li vocale **U** per li sam form angulosi **V**, li Latines arondat li litter desde li fine del II-esim secul a **U**. In li XI-esim secul, li form angulosi reaparit e por li consonant e por li vocale.

Ancor in li XVI-esim secul, on usat alternativmen **I** e **J**, poy **U** e **V** por sones queles on distinyet tre bon in li parlada, e on scrit por exemple in francés *avec*, *avra*, *jl*, *jnutile*, etc. por *avec*, *aura*, *il*, *inutile*. Ja in 1530 un francés grammatico hat proposit atribuer un litter a un son determinat, por far cessar ti confusion. Ma solmen in 1762 li lexico del francés Academie admisset ti reform in li 4-esim edition de su dictionarium.

Li **W** es un litter foren al latin alfabet. It veni de nordic landes. On admisset it in li romanice lingues por posser ortografar li paroles de germanic origine, quam *William*, *wagon*, etc. On memora que li sam casu hat presentat se in latin con **Y** e **Z** queles esset admisset in ti lingue por posser ortografiar li paroles venient del grec.

Li punctu sur li I.

In comensa, li Grecos representat li son I per un streca in zigzag (fig. 2), hereditat del Fenicianes. Desde que ili fat it rect, li litter ne ha mutat su form, exceptet que on adjunctet un punctu. Ti punctu quel ne existet in li antiquitá, origina del epoca u on adoptet li gotic scriptura in quel pluri litteres havet gambes de sam formes. Por distinyer du I successiv de un u, on mettet sur it un accentu e on scrit *thesaurarii*, *filii*. In li XV-esim secul, li accentu esset viceat per un simplic punctu. Durant long témpor anc y esset accentuat, poy ti custom extinyet.

Quande in li XVII secul, on creat li J modificante levimen li I, on plazzat sur it anc un punctu, pro analogie. Tamen ti punctu ne esset indispensabil pro que null confusion esset possibil inter du J e un altri litter. Li analogie ci ha esset plu fort quam li ley del minimal effortie.

Li punctuation (Interpunctuation).

Li punctuation esset admisset e regularisat long pos li nascentie del scriptura. Ancor in li antiquitá e in medievie on ne separat li paroles, quo fat tre desfacil li letion de textus. Cert autores scrit per verses por dar un poc de claritá in lor textus, ma generalmen li punctuation es absent in ili.

Li unesim systema de punctuation esset inventet circum li annu 200 ante J.-C. per li grammatico Aristophanes de Byzanz. Li piazza del punctu constituet li principie de it, de u li parol punctuation. Plazzat in infra, li punctu indicat un litt pause (hodie on vell metter un comma) ; in li medie del linea it indicat un pause plu long (= punctu-comma (semicolon) hodie). In fine on plazzat it in supra quande li frase esset finit (= un punctu hodie).

In li curs del seculs ti metode ha constantmen variat, e li historicos basa se sovente sur li punctuation de un manuscrit por determinar li epoca de it. In li comensa del seculs del Era Cristian, por exemple, on usat li punctu sive unic, sive duplic, triplic, o quadriplic, disposit in pluri manieres. Por marcar plu bon li fine del frases, li principal separation, on usat figuras plu frappant, p. ex. cordies, rosettes, folies, etc.

In medievie, li punctu es vikat per un specie de 7 ; in li XI secul per li arab cifre 5.

Li comma aparit solmen li IV-esim secul pos J.-C. ; unesimli it servit solmen a marcar li erras. Li parol francés « *virgule* », veni del latin « *virgula* » significant « *litt flagell* ». Esque to ne es deliciosi ironie !

Desde li XIII-esim secul, li regules del punctuation es plu e plu negliget ; ili comensa esser fixat solmen in li XV-esim, ye li invention del printerie, e li unesim printeros punctuat sovente sin metode.

Punctu de interrogation.

Por marcar li interrogation, li grecos usat li punctu-comma ; li Latinos adoptet ti signe por marcar un medial pause, it es in li sam casu quam hodie ; poy, mettente li comma sur li punctu (!), ili creat li punctu de interrogation (?).

Li olfres roman.

Du species de cifras es usat hodie simultanmen : li cifras arab in aritmetica, e li cifras roman in cert numerotationes (p. ex. seculs, cloccas, reyes, etc.) Durant que li roman cifras ha esset usat constantmen del antiquitá, li cifras arab esset introductet in Europa in li X-esim secul.

In comensa on vell creder que li essential signes del roman numerotationes **I**, **V**, **X**, **L**, **C**, **D**, **M**, es omnes traet del litteres. To es ver solmen por **C** e **M** queles es vermen li iniciales de Cent e Mill. Concernent li altri signes, on deve revenir al synoptic tabelle por comprender lor origine. Quam on constata in li fig. 7, li Romanes hat renunciat a pluri litteres del alfabet grec, specialmen al aspirates chalcidian *Theta*, *Phi* e *Khi*. Sam quam li Grecos hat atribuet un nov signification, ti de vocales, a ti litteres fenician queles ili ne besonat, samli li Romanes utilisat li tri chalcidian aspirates por un nov scope.

Li scientistes es presc cert que primitivmen li signe de **Khi** servit representar 100 in latin, e **Phi** 1000, e que plu tard on preferet li iniciales de **Centum** e **Mille**. Tamen on continuat usar li dextri demi de **Phi** (= D) por indicar li demi de 1000, it es 500 ; durant que **Psi**, adoptet por 100, prendet li form **l**, perdit su demi de levul por significar **L** = 50, quo ha restat.

Pri **X** significant 10, on crede que su origine es etrusc ; it es probabil que li Romanes adoptet su superiori demi por representar li demi de 10, it es 5.

Li cifras arab.

It es un erra nominar les arab. In realitá ili esset creat del Hindus. Li Arabes ha solmen transmisset les al Cristianes, in li X-esim secul, con lor scientie mathematic quel havet un grand avansa sur ti del altri popules.

Li null (zero) esset inventet solmen plu tard, in li XII-esim secul, e tamen it dat su nómín al totalité del signes. Li parol « **olfre** » veni efectivmen de *cifra*, o *zifra* (sifr), quo significa *null* in arab.

Long pos li adoption del cifras arab per li mathematicos, li popul continuat usar li roman cifras por li calculation. On deve atender til li XV-esim secul por vider li usagie del cifras arab devenir populari.

Al Hindus on debi ne solmen li invention del cifras ma anc ti del decimal systema quel Schlegel considera quam li max important del homan decovritions pos li invention del litteres. On trova li cifras usat in li edictes del rey Açoka, 256 annus ante J.-C. On atribue finalmen al Hindu Bhaskara li idé plazzar li numerator del fractiones super li denominator.

(Ex li libre « Manuel d'écriture » (Payot, Lausanne 1937) de prof. R. BERGER. Traduction ex francés del autor.)

N.-B. — Li titules del figuras es in francés proque ili apartene al clichés del original textu.

OCCIDENTAL-LITERATURA

* Editiones mimeografat.	Afrancat
IN ANGLES: * RAXWORTHY A. W. S.: Introductory Occidental Grammar	SFr. 0.60
* Dr KEMP: Dictionarium Angles-Occidental (in preparation).	
* FEDERN-KEMP-HAISLUND: Occidental-English vocabulary	0.60
IN DAN: FEDERN-HAISLUND: Occidental-Dansk Ordbog	0.50
IN FINN: T. TATTARI: Occidental Kansainvälinen Kieli	1.50
IN FRANCES: L.-M. de GUESNET: L'Occidental (principes de la langue)	0.30
* Qu'est-ce que l'Occidental ?	0.30
* Aux Espérantistes	0.30
BERGER: L'Occidental en 5 leçons	0.40
* Dictionnaire Français-Occidental, 316 p., en cahiers	5.—
* Solidement relié	9.80
* Vocabularium Occidental-Français (2-ésim edition reviset)	0.50
* Historiettes in Occidental (avec traduction française)	0.60
CHANAUD: Index Français-Occidental au Radicarium	0.80
IN GERMAN: Divers Autores: « Occidental, die Weltsprache », 256 S. Leinen 4.50, Geh.	3.—
Divers Autores: « Die Weltsprachenfrage in moderner Auffassung »	Ex. *Occidental * 1.20
Mag. phil. A.-Z. RAMSTEDT: Occidental Kursus in 10 Lektionen	die 1.20
GRABER ERNST: Wörterbuch Occ.-Deutsch und Deutsch-Occ.	die Weltsprache * 1.—
* BLASCHKE: Der Kampf um die Weltsprache	0.50
JANOTTA: Leitfaden der Weltsprache Occidental	1.—
OCCIDENTAL, Begründung, Grammatik, Wortbildung	0.50
GAR: Wörterbuch Deutsch-Occidental, Gebunden 5.30, Broch	2.50
* Dr SCHRAG, Dr ASCHWANDEN, Dr NIDECKER: Die moderne Weltsprache	0.50
* Historiettes in Occidental (con trad. german)	0.60
FEDERN: Occidental-Grundlage für einen Internat. Terminol. Code	0.50
IN ITALIAN: * G. BEVILACQUA: Corso di « Occidental » per gli italiani	1.20
* Dr Ing. DAL MARTELLO: Corso in 3 lezioni per corrispondenza	0.60
* FEDERN-RITTER: Vocabolario Occidental-Italiano	0.30
Dr Ing. Prof. A. PICCHI: Stato attuale del problema della L. I.	0.80
IN HISPAN: FEDERN-PEDRERO: Clave Occidental-Hispan (in preparation).	
CEBREIROS: Grammatica in hispan (in preparation).	
VARELA: Curs per correspondantie in 5 lecciones	0.50
IN NEDERLANDES: Grammatica (in preparation)	
IN PORTUGALES: * Curs de Occidental	0.30
IN RUMAN: ESCHENASY: Grammatica in ruman	0.60
IN RUSS: E. DE WAHL: Occidental por international relations (clave 8 p.)	0.20
IN SVED: Dr C.-E. SJOSTEDT: Occidental de internationella ordens språk	0.40
Dr B. BLOME: Lærobok i Occidental, 72 p.	1.80
Dr C.-E. SJOSTEDT: Dubbel Occidental-ordbok, 98 p.	1.80
C.-W. von SYDOW: Occidental eller Esperanto	0.50
K. SEGERSTAHL: Hjælpspræksfragen	0.40
IN TCHECOSLOVAC: O. MULTIS: Problem reci mezinárodní	0.50
J.-A. KAJŠ: Ucitel svetomluvy	0.50
J. PODOBSKY: Co je Occidental ?	0.20
KAJŠ-PODOBSKY-SVEC: Slovník Česko-Occidentalský	1.50
J.-A. KAJŠ: Occidental, moderné rec mezinárodní	1.—
* SVEC-PODOBSKY-FEDERN: Slovník Occidentalsko-Cesky	0.60
PUBLICATIONES POR ESPERANTISTES: Occidental au Esperanto	0.30
Vocabularium Esperanto-Occidental e Occidental-Esperanto	0.30
Esperanto als Welthilfssprache	0.20

PUBLICATIONES IN OCCIDENTAL

	Afrancat
AMICIS: Manuel Menendez (Ovre 6)	SFr. 0.60
BALMONT K.: U es mi hem? (Ovre 2)	* 0.60
BERGER: Curs de Occidental in Occidental	* 0.50
" Historie del Lingue international (Cosmoglotta Nr 116)	* 0.50
* " Vocabularium del centres de interesse	* 2.---
* CREUX: Stenografie Duployé por Occidental	* 1.---
* " Rythmica in Occidental	* 0.60
* CREUX e BERGER: Li origines de Occidental	* 0.80
DIVERS AUTORES: Crestomatie de Occidental	* 1.50
* FEDERN Ilmari: Lexico Occidental-Occidental (in preparation)	* 6.50
De GUESNET: Manuale de conversation	* 0.40
GUILBERT-DEMINGER: Vocabularium Occ.-F.A.G. (por li tomes 1-6 de Ovre)	* 0.75
* Ing. HOERBIGER: Quo Occidental presenta al german ingeniero	* 0.50
* Ing. JANOTTA: Construction de un terminologic code	* 0.30
JANOTTA: Julius Lott, precursor de Occidental	* 1.20
* LITTLEWOOD: Vers un lingual instruction plu rational	* 0.50
MASARYK: Democratie e Humanità (Ovre 5)	* 0.45
PIGAL: Essentie de Occidental (Cosmoglotta Nr. 56)	* 0.50
PODOBSKY J.: Li astres del Verne (original poemas)	* 0.80
POE: Un descense in Maelstrom (Ovre 4)	* 0.60
R. ROLLAND: Europa e Asia, con vocabularium (Ovre 1)	* 0.60
TAKUR: Nationalism in Occidente	* 1.10
E. de WAHL: Radicarium directiv in 8 lingues	* 3.---
" Spiritu de Occidental	* 3.---
Ancian collectiones de Cosmoglotta. Secun li annus	de fr. 4.— a 30.---
Ancian collectiones de Helvetia, per annu	* 2.---
Divers: SKOLD-PODOBSKY: Tri canzones. Du canzones (por un voce e piano) chascun	* 1.50
Prospecte in Occidental por adjunter in lettres, 5 ex. gratuit; chascun in plu	* 0.02
Verd carte de propaganda (duplic). Form. 10/25, chascun ex.	* 0.08
Covertes, postcartes con propaganda-textu, 100 ex.	* 1.50
Marcas glutinabil, 100 ex.	* 0.80
Insignie	* 1.50

Omni ti libres es recibibil de: Institute Occidental, CHAPELLE (Vd), Postchec-contos: Lausanne II.1969; Berlin 1683 36; Bruxelles 3504 45; Copenhag 269 72; Paris 1765 46; Stockolm 74 395.

COSMOGLOTTA

CONDITIONES DE ABONNAMENT.

Li precie de un simplic abbonament es li correspondent valore de Fr 4.— sviss o 13 respons-cupones. Ti quel misse Fr. 7.— sviss recive 3 exemplares (abonnament de propaganda). Li precie del abbonament in li moné del divers landes es indicat sur li ultim págine de chascun numero. — Li abbonament a Cosm. es annual, departe del 1-esim de chascun mensu e continua til li scrit revocation del abonator. On posse inviar li abbonament al sequent adresses:

- ANGLIA: H. D. Akerman, 84, Fernleigh Road, Winchmore Hill, LONDON N. 21.
 " Leonard Beer, 40 St. Rule St., LONDON S. W. 8
 BELGIA: Institute Occidental, CHAPELLE (Vd), Svissia (Pch. Bruxelles-Brussel 3504.45).
 CUBA: Bonneval e Fuentes, Arguelles 204, CIENFUEGOS.
 DANIA: Institute Occidental CHAPELLE (Vd), Svissia (pch. Kóbenhavn 269 72).
 ESTONIA: Kosmoglott, Eha 10, TALLINN.
 FRANCIA: L.-M. de Guesnet, 83, Rue Rochechouart, PARIS 9 (pch. Paris 26437).
 " Institute Occidental, CHAPELLE (Vaud), Svissia (Pch. Paris 1765 46).
 GERMANIA: Heribert Rosenlecher, PANA-Universal-Buchversand, WIESBADEN-BIEBRICH
 (Pch. Frankfurt a/M. 44977).
 HISPANIA: C. Varela, Maclá 5, FIGUERES (Cat.).
 ITALIA: Dr Ing. E. Dal Martello, San Silvestro-Casellario, 90, ROMA.
 NEDERLAND: H. Littlewood, v. Panhuysstr. 18 A., GRONINGEN.
 PORTUGAL: R. de Beça e Melo, Av. Sac. Cabral 56, PENAFIEL.
 RUMANIA: Aurel Eschenasy, Calea Brestei 27, CRAIOVA.
 TCHECOSLOVACIA: Jos Svec, Skroupova 2, PRAHA VII (Pch. Praha, Nr. 9.438).
 SVEDIA: Sved Occidental Federation, Box 171, STOCKHOLM (pch. Stockholm 70 315).
 " Institute Occidental, CHAPELLE (Vd), Svissia (pch. Stockholm 74395).
 SVISSIA e altri landes: Institute Occidental, CHAPELLE (Vd), (pch. II. 1969).
 U. S. A.: M. K. Gardner, 803 State Street, MADISON (Wis.)